

## **O BELÉN QUE NAMOROU BEGONTE**

Belén, unhas montañas, un val e un río;  
aló, ao lonxe, vai frío.

Xentes de hoxe agardan  
algo anunciado  
en tempos pasados,  
namentras que alguén  
daquel lugar  
dedica o seu facer  
a desbrozar e a fabricar  
e a conxugar o seu esforzo  
co veciño e compañeiro  
desde ben mozo.

Mais trala precisa harmonía  
das esceas bule-bule na aldea  
hase cumprir a promesa  
que representa o Nadal.

E así acontece ano a ano  
dende fai cincuenta xa,  
no Belén do Xudá galaico:

Un neno recién nado,  
un pai vello, e unha nena que espera  
porque aceptou ser fidel a Deus;  
unha viaxe de obriga,  
unha noite escura nun refuxio  
cheo de vida e falta de comodidades,  
con boi e mula  
e moita espera.

Esceas dun día calquera  
con fases de lúa e remilgos do sol;

e algo máis acó ,  
homes que dedican a vida  
a manterse vivos  
coidando rebaños de ovellas;  
peixes que xogan co anzol do pescador;  
artesáns zoqueiros,  
muiñeiros que fan do trigo en grao  
fariñas pra facer pan;  
galiñas que empoleiran  
cando o sol se agocha tras da montaña;  
camiñantes eximios  
que buscan a ruta feita por unha estrela;  
ferreiros que aluman o despuntar do día  
e coas chispas da forxa  
fan dos ferros o seu vivir;  
alfareiros que fan co barro  
enxoval e louzas.

Todo está aquí, nesta sala  
feita de amor e humildade  
alumeada co resplandecente escintilar  
de lóstregos e rebumbios do celeste orbe  
que limita co teito telar,  
afeito ao retumbar sincrónico  
da hora exacta de cada día  
e previos á choiva milagreira  
na que frorecen louvanzas  
e pregarías ao noso Deus feito neno.  
Begonte, co seu belén,  
fai mais fermoso o Nacemento  
de Xesús